

Студенттердің шәкіртақысын бірінші болып ОҚМУ көтерді

ҚР Президенті Қасым-Жомарт Тоқаев Нұр-Сұлтан қаласында Жастар жылының жабылуына орай өткен салтанатты жиында 2020 жылдың қаңтар айынан бакалавриат, магистратура және докторантурада оқитын жалпы саны 133 мың студенттің шәкіртақысы 25 пайызға көбейетінін айтқан болатын. Президент тапсырмасына сәйкес М.Әуезов атындағы Оңтүстік Қазақстан мемлекеттік университетінің студенттері осынау қуанышты жаңалықтың шарапатын көре бастады.

 Дилара БИМЕНОВА,
«*Öntüstik Qazaqstan*».

Оқу орнының қаржылық және экономикалық әлеуетін үнемдей отырып, Мемлекет басшысының студенттердің шәкіртақысын өсіру жөніндегі тапсырмасын еліміздегі жоғары оқу орындарының арасында алғашқылардың бірі болып іске асырып отырмыз. Бұл – біз үшін үлкен жетістік.

Студенттердің әлеуметтік жағдайы жақсы болғанда ғана білім сапасының жоғарылайтыны түсінікті. Сондықтан бірінші кезекте осы мәселеге баса мән берудеміз. Грант негізінде оқитын студенттерге түгелдей жоғарылатылған шәкіртақы аударылды. Айта кетейік, қазіргі таңда университетімізде жастардың біліміне және олардың диплом алғаннан кейін жұмыспен қамтылуына ерекше ден қойылған. Жақында ашылған өндірістік базамыз да студенттеріміздің теория мен тәжірибесін ұштастыруына өз үлесін қосады деп сенеміз, – дейді аталмыш оқу орнының ректоры Дария Қожамжарова.

Жалпы, ОҚМУ-да оқитын 28 мың жастың 17 мыңы осы жеңілдікке ие болуда. Толығырақ тоқтала кетсек, 2020 жылдан бастап бакалавриатта оқитын студенттер – 26 186, магистратурада оқитын студенттер – 66 913, ал, докторантурада оқитын студенттер 102 498 теңге көлемінде шәкіртақы ала бастады.